

焦序

余年十三就讀於揚州城內江蘇省立第八中學，即知當時四年級同學陳廣沅課業成績每學期皆爲第一名，同時操行亦列甲等，爲全校最優秀之學生，從而心儀其人。但以班次懸殊，不多接近。若干年後，廣沅學長赴美國伊利諾大學專攻鐵路機車工程，獲機械碩士學位，回國後即在鐵路工作，頗多建樹，更深傾慕。

數年前，廣沅兄已在美國學校任教後退休，留居彼邦，以著述自娛。經常爲台北各雜誌撰寫文章，于故鄉揚州風俗人情，以及中學時代之讀書生活與當日師生群像，娓娓道來，繪聲繪影，余讀之極饒興趣，對此萬里外之舊雨，不勝遙念，即與通信一傾多年積愆。從此魚雁往還不絕，終成晚年深交。

今春廣沅兄以其所寫自傳「壯遊八十年」一稿寄示，並囑校閱，因獲先睹之快，始詳悉其早年在美留學實習之苦況，與歸國後在各大鐵路擔任機廠長、機務處長、機械正工程師之經歷，抗戰時期在敵機轟炸下辦理軍民運輸與搶修滇緬路之艱困，赴美洽購鐵路器材之周折，勝利後從事善後救濟儲運及民航空運公司之經營，以至晚歲在美任教之情形，旁及中外名勝古蹟風俗習慣。萬緒千頭，一一述錄，深入淺出，有條不紊，披覽一過，使人有如在大學選聽歷史、地理、交通、機械、教育、社會等

課程，益我神智不少，乃愈爲之嘆服。

竊維廣沅兄生平對於國家社會之供獻至巨，陳立夫先生嘗謂其能用其所長，信然。夫近年之留學外國者，往往經綸滿腹，而回國之後用非所學。廣沅兄當求學時代，目擊國家之支離破碎，外侮之紛至沓來，卽思日後能以所學報國。其在友邦頗多就業機會，顧以不願楚才晉用，毅然捨棄優厚之待遇，返回祖國，埋頭苦幹，發揮所長，卒以達成早歲之願望，此乃廣沅兄愛國精神之不可及處。

大陸陷共後，廣沅兄小住香港，卽赴美國，以其道德學問經驗，任教大學固綽有餘裕，而寧在一中等學校講授物理數學，終因教學嚴謹，校風丕變，以外籍教師一人之力，竟將一尋常之學校，使成爲一優良之學校而知名於州際，此又廣沅兄敬業精神之不可及處。

廣沅兄學貫中西，今且八十高齡，猶復孜孜不倦，精研周易，著有專書，能用數學原理說明八卦及六十四卦之形成，爲六爻占卜休咎作新的解釋。將中國數千年前古籍，闡發幽微，並以近代科學與之合參，卓有創見，遂使我國最古老最寶貴文化遺產之價值，益顯於世界學術界，此更爲廣沅兄好學精神之不可及處。

廣沅兄愛國敬業好學之精神既爲一般人所難及，故其「壯遊八十年」一書之印行，余認爲確有重大之意義，於我國今後之甚多青年，尤爲鼓勵與啟導之作用，而與普通之自傳不同。頃承督序於余，爰謹抒感想如上述。

民國六十七年七月焦席稷承允甫序於台北